

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১২১/২০১৭

ঢাকা, সোমবার ১৯ জুন ২০১৭, ৫ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। তথ্য অধিকার আইন বিষয়ে সচেতনতার ওপর গুরুত্বারোপ রাষ্ট্রপতির
- ২। ব্যাংক হিসাবে আবগারি শুল্ক কমানো হবে : অর্থমন্ত্রী
- ৩। বাজেটে ভ্যাট ও ট্রান্স সহনীয় পর্যায়ে হবে : বাণিজ্যমন্ত্রী
- ৪। এমডিজি-৪ ও ৫ এর লক্ষ্যমাত্রা অর্জনের প্রচেষ্টা চলছে : জাতীয় সংসদে স্বাস্থ্যমন্ত্রী
- ৫। ঈদে পোশাক শ্রমিকদের পর্যায়ক্রমে ছুটি দেওয়া হবে : স্বরাষ্ট্রমন্ত্রী
- ৬। কর্মকর্তাদের আন্তরিকভাবে কাজ করতে হবে : এলজিআরডিমন্ত্রী
- ৭। ১২ হাজার কোটি টাকায় ৫৩টি নৌপথ খনন করা হবে : নৌ পরিবহণমন্ত্রী
- ৮। উপকূলীয় পাঁচ জেলায় বনায়ন কর্মসূচির উদ্বোধন করলেন বন মন্ত্রী
- ৯। পুনরায় পাহাড় ধস, দুই জেলায় নিহত ৫
- ১০। ৩৫তম বিসিএসে ১৩৮ জন নন- ক্যাডার পদে নিয়োগ

১। তথ্য অধিকার আইন বিষয়ে সচেতনতার ওপর গুরুত্বারোপ রাষ্ট্রপতির

রাষ্ট্রপতি মো. আবদুল হামিদ তৃণমূল পর্যায়ে তথ্য অধিকার (আরটিআই) আইন বিষয়ে গণসচেতনতা বাড়াতে প্রচারণা চালানোর জন্য কমিশনের (আইসি) প্রতি আহ্বান জানিয়েছেন। তিনি বলেন, সরকারি ও বেসরকারি উভয় সেক্টরের কার্যক্রমে স্বচ্ছতা ও জবাবদিহিতা আনা এবং সুশাসন প্রতিষ্ঠায় তথ্য অধিকার (আরটিআই) আইন একটি গুরুত্বপূর্ণ অস্ত্র। গতকাল বঙ্গভবনে রাষ্ট্রপতির কাছে প্রধান তথ্য কমিশনার (সিআইসি) অধ্যাপক ড. গোলাম রহমানের নেতৃত্বে তিন সদস্যের একটি প্রতিনিধিদল কমিশনের বার্ষিক প্রতিবেদন-২০১৬ পেশকালে তিনি এ আহ্বান জানান। সাক্ষাৎ শেষে রাষ্ট্রপতির প্রেস সচিব মো. জয়নাল আবেদীন এ কথা জানান। সূত্র-সংবাদ (শেষ পৃ.,ক.৫), সমকাল (পৃ.৫,ক.১), নিউজ টুডে (পৃ.২,ক.১), ডেইলি সান (পৃ.২,ক.২)।

২। ব্যাংক হিসাবে আবগারি শুল্ক কমানো হবে : অর্থমন্ত্রী

অর্থমন্ত্রী আবুল মাল আবদুল মুহিত বলেছেন, বাজেটে ব্যাংকের টাকায় যে হারে আবগারি শুল্ক প্রস্তাব করা হয়েছে, তা কমানো হবে। তবে কমিয়ে কত করা হবে, তা তিনি বলেননি। এ ছাড়া কালো টাকা সৃষ্টির পথ বন্ধ করতে জমি কেনাবেচায় মৌজা মূল্য ব্যবস্থা পরিবর্তন করে প্রকৃত দামে নিবন্ধনের ব্যবস্থা করা হবে বলে জানিয়েছেন অর্থমন্ত্রী। গতকাল সচিবালয়ে অর্থ মন্ত্রণালয় এবং ব্যাংক ও আর্থিক প্রতিষ্ঠানগুলোর মধ্যে ২০১৭-১৮ সালের বার্ষিক কর্ম সম্পাদনা চুক্তি স্বাক্ষর অনুষ্ঠানে অর্থমন্ত্রী এসব কথা বলেন। সূত্র-সমকাল (পৃ.১,ক.৭), ইত্তেফাক (শেষ পৃ.,ক.৮), ডেইলি সান (পৃ.১,ক.১), নিউজ টুডে (পৃ.১,ক.৬)।

৩। বাজেটে ভ্যাট ও ট্রান্স সহনীয় পর্যায়ে হবে : বাণিজ্যমন্ত্রী

প্রস্তাবিত ২০১৭-১৮ অর্থবছরের বাজেটে ভ্যাট এবং ট্রান্স সহনীয় পর্যায়ে বাস্তবসম্মত হবে বলে জানিয়েছেন বাণিজ্যমন্ত্রী তোফায়েল আহমেদ। তিনি বলেন, ভ্যাট ও ট্রান্স নিয়ে জাতীয় সংসদে এবং বাইরে আলোচনা হচ্ছে। বাজেট পাস হওয়ার পর আর কোনো আলোচনা থাকবে না। জাতীয় সংসদে বাজেট আলোচনায় সংসদ নেতা প্রধানমন্ত্রীর বক্তৃতায় তা স্পষ্ট হবে। গতকাল ঢাকায় কৃষিবিদ ইনস্টিটিউট বাংলাদেশ থ্রি-ডি সেমিনার হলে বাংলাদেশ কৃষি অর্থনীতিবিদ সমিতি আয়োজিত বাজেট উত্তর সেমিনারে প্রধান অতিথির বক্তব্যে তিনি এসব কথা বলেন। সূত্র-সংবাদ (শেষ পৃ.,ক.৩), যুগান্তর (পৃ.২,ক.১), ফিনানশিয়াল এক্সপ্রেস (শেষ পৃ.,ক.৫), নিউজ টুডে (পৃ.১,ক.১)।

৪। এমডিজি-৪ ও ৫ এর লক্ষ্যমাত্রা অর্জনের প্রচেষ্টা চলছে : জাতীয় সংসদে স্বাস্থ্যমন্ত্রী

স্বাস্থ্য ও পরিবার কল্যাণমন্ত্রী মোহাম্মদ নাসিম বলেছেন, স্বাস্থ্যসেবা খাতে সফলতার ধারাবাহিকতা বজায় রাখতে জাতিসংঘের এমডিজি-৪ ও ৫ এর লক্ষ্যমাত্রা অর্জনে সর্বাঙ্গিক কর্মকাণ্ড পরিচালনা করা হচ্ছে। গতকাল রোববার জাতীয় সংসদে এক প্রশ্নের জবাবে তিনি আরো বলেন, ইতোমধ্যে এখাতে এমডিজি লক্ষ্যমাত্রা অর্জনের জন্য বাংলাদেশ আন্তর্জাতিক স্বীকৃতি অর্জন করেছে। সূত্র-ইত্তেফাক (শেষ পৃ.,ক.৫), জনকণ্ঠ (পৃ.১,ক.২), নিউজ টুডে (পৃ.৩,ক.১)।

৫। ঈদে পোশাক শ্রমিকদের পর্যায়ক্রমে ছুটি দেওয়া হবে : স্বরাষ্ট্রমন্ত্রী

ঈদের আগে রাস্তাঘাট যানবাহনের চাপ কমাতে এবারও পোশাক শ্রমিকদের পর্যায়ক্রমে ২২ জুন থেকে ২৫ জুনের মধ্যে ছুটি দেওয়ার নির্দেশ দেওয়া হয়েছে বলে জানিয়েছেন স্বরাষ্ট্রমন্ত্রী আসাদুজ্জামান খাঁন কামাল। এর আগে সব কারখানার শ্রমিকদের পাওনা, বোনাস ও বেতন পরিশোধের জন্য মালিকদের বলা হয়েছে বলে জানান তিনি। এ ছাড়া সড়কপথে মানুষ যাতে যানজটের ভোগান্তিতে না পড়ে সেদিকে দৃষ্টি রেখে আইনশৃঙ্খলা বাহিনী কাজ করছে বলে জানান তিনি। গতকাল ১৮ জুন রোববার স্বরাষ্ট্র মন্ত্রণালয়ে ঈদুল ফিতর উপলক্ষে সার্বিক আইনশৃঙ্খলা, গার্মেন্টস শ্রমিকদের কল্যাণ নিশ্চিত ও ঈদপূর্ব বেতন ভাতাদি পরিশোধ, সড়ক-মহাসড়ক যানজটমুক্ত রাখার বিষয়ে আইনশৃঙ্খলা

সংক্রান্ত এক বৈঠক শেষে তিনি একথা বলেন। সূত্র-সংবাদ (পৃ.১,ক.৫), ইত্তেফাক (পৃ.১৯,ক.৮), বাংলাদেশ টুডে (পৃ.১,ক.৫), নিউজ টুডে (শেষ পৃ.,ক.৬)।

৬। কর্মকর্তাদের আন্তরিকভাবে কাজ করতে হবে : এলজিআরডিমন্ত্রী

এলজিআরডিমন্ত্রী খন্দকার মোশাররফ হোসেন বলেছেন, শুধু সরকারের উন্নয়নকাজ সম্পন্ন করলে চলবে না। জনকল্যাণকে সর্বাধিক গুরুত্ব দিয়ে কর্মকর্তাদের আন্তরিকভাবে কাজ করতে হবে। তিনি বলেন, স্থানীয় সরকার বিভাগ সফলভাবে কাজ বাস্তবায়ন করেছে। গত অর্থবছরের বার্ষিক কর্মসম্পাদন চুক্তির শতকরা ৯৮ দশমিক ৮৩ ভাগ সম্পন্ন হয়েছে। মন্ত্রিপরিষদ বিভাগ এই মন্ত্রণালয়কে শ্রেষ্ঠ বলে ঘোষণা দিয়েছে। গতকাল ১৮ জুন রোববার সচিবালয়ে মন্ত্রণালয়ের সম্মেলনে কক্ষে ২০১৭-১৮ অর্থবছরের বার্ষিক কর্মসম্পাদন চুক্তি অনুষ্ঠানে এসব কথা বলেন মন্ত্রী। সূত্র-সমকাল (পৃ.৫,ক.৬), জনকণ্ঠ (শেষ পৃ.,ক.৩)।

৭। ১২ হাজার কোটি টাকায় ৫৩টি নৌপথ খনন করা হবে : নৌ পরিবহনমন্ত্রী

নৌপরিবহনমন্ত্রী শাজাহান খান বলেছেন, মৃতপ্রায় নৌপথগুলো সচল করার লক্ষ্যে প্রায় ১২ হাজার কোটি টাকা ব্যয়ে ৫৩টি নৌপথ খননের উদ্যোগ নেওয়া হয়েছে। বর্তমানে ৩৬টি নৌপথ খননের কাজ চলমান আছে। গতকাল রোববার সংসদ অধিবেশনে টেবিলে উত্থাপিত প্রশ্নোত্তর পর্বে নৌমন্ত্রী এ কথা বলেন। সূত্র-সমকাল (পৃ.৪,ক.৮), ভোরের কাগজ (শেষ পৃ.,ক.৫), অবজাবতার (পৃ.২,ক.১)।

৮। উপকূলীয় পাঁচ জেলায় বনায়ন কর্মসূচির উদ্বোধন করলেন বন মন্ত্রী

পরিবেশ ও বন মন্ত্রী আনোয়ার হোসেন মঞ্জু গতকাল রোববার বন অধিদপ্তরের আওতাধীন 'বাংলাদেশের পাঁচটি উপকূলীয় জেলায় বনায়ন প্রকল্পের' উদ্যোগে কাউখালী উপজেলার পূর্ব আমড়া জুড়ি মাধ্যমিক বিদ্যালয় প্রাঙ্গণে বৃক্ষ রোপণ কর্মসূচির উদ্বোধন করেন। এ প্রকল্পের আওতায় গোপালগঞ্জ, পিরোজপুর, বাগেরহাট, খুলনা ও সাতক্ষীরা জেলায় গাছের চারা রোপণ করা হবে। সূত্র-ইত্তেফাক (শেষ পৃ.,ক.১)।

৯। পুনরায় পাহাড় ধস, দুই জেলায় নিহত ৫

প্রবল বর্ষণের মধ্যে পাহাড় ধসে মাটি চাপা পড়ে দুই জেলায় চার শিশুসহ পাঁচজনের মৃত্যু হয়েছে। গত শনিবার মধ্যরাতের পর ও গতকাল রোববার খাগড়াছড়ির রামগড়, লক্ষীছড়িতে এবং মৌলভীবাজারের বড় লেখায় ধসের ঘটনা ঘটে বলে পুলিশ ও স্থানীয় সূত্রে জানা গেছে। স্থানীয়ভাবে জানা যায়, গত কয়েক দিনের টানা বর্ষণে এলাকার অসংখ্য বাড়ি-ঘর ঝুঁকিতে রয়েছে। যে কোনো সময় ঘটতে পারে আরও বড় ধরনের দুর্ঘটনা। সূত্র-ইত্তেফাক (পৃ.১,ক.৩), সংবাদ (পৃ.১,ক.৫), ডেইলি স্টার (পৃ.১,ক.১), নিউ নেশন (পৃ.১,ক.১)।

১০। ৩৫তম বিসিএসে ১৩৮ জন নন- ক্যাডার পদে নিয়োগ

৩৫তম বিসিএসের লিখিত ও মৌখিক পরীক্ষায় উত্তীর্ণ হয়েও ক্যাডার না পাওয়া চাকরি প্রার্থীদের মধ্যে আরও ১৩৮ জনকে প্রথম শ্রেণির নন-ক্যাডার পদে নিয়োগ দিয়েছে সরকারি কর্মকমিশন (পিএসসি)। নন-ক্যাডার পদে নিয়োগ (বিশেষ) বিধিমালা অনুযায়ী মেধাক্রম ও বিদ্যমান কোটা পদ্ধতির ভিত্তিতে গতকাল তাদের নিয়োগের সুপারিশ করে কমিশন। পিএসসি এর আগে ৩৫তম বিসিএসে উত্তীর্ণদের মধ্য থেকে দুই দফায় ৫৫৫ জনকে প্রথম শ্রেণির নন-ক্যাডার পদে নিয়োগের সুপারিশ করে। সূত্র-সংবাদ (শেষ পৃ.,ক.১), ইত্তেফাক (পৃ.১৯,ক.৩), ইন্ডিপেনডেন্ট (পৃ.১৯,ক.২)।

সম্পাদকীয়

- ক. **ইত্তেফাক** : প্রবাসে কর্মরত বাংলাদেশি কিছু শ্রমিকের নানা অপরাধমূলক কর্মকাণ্ডে জড়িয়ে পড়ায় দেশের ভাবমূর্তি ক্ষুণ্ণ হচ্ছে উল্লেখ করে এ ব্যাপারে সংশ্লিষ্ট দূতাবাসগুলিকে সর্বদা সজাগ ও সতর্ক থাকার সুপারিশ।
- খ. **জনকণ্ঠ, ভোরের কাগজ, যুগান্তর, ডেইলি স্টার** : ডেঙ্গু ও চিকুনগুনিয়া রোগ প্রতিরোধে এডিস মশার বংশবৃদ্ধি রোধ করতে জনসচেতনতা তৈরির আহ্বান।
- গ. **প্রথম আলো** : ঈদে ঘরে ফেরা মানুষের যাত্রা নির্বিঘ্ন করতে সড়ক পরিবহণ ও নৌচলাচলের সাথে সম্পৃক্ত সরকারের সব বিভাগকে মানুষের দুর্ভোগ ন্যূনতম পর্যায়ে রাখতে প্রয়োজনীয় পদক্ষেপ নেওয়ার ওপর গুরুত্বারোপ।
- ঘ. **ইনকিলাব** : পানিসম্পদ মন্ত্রণালয়ের অধীনস্থ বোর্ড, অধিদফতর, পরিদফতরগুলোর দুর্নীতি লাঘবে কঠোর ব্যবস্থা নেওয়ার দাবি।
- ঙ. **যায়যায়দিন** : দেশে উৎপাদিত চামড়াজাত পণ্যের বিদেশে রপ্তানি বাড়ায় স্বস্তি প্রকাশ করে এ ধারা অব্যাহত রাখতে প্রয়োজনীয় উদ্যোগ গ্রহণ করার সুপারিশ।
- চ. **ডেইলি সান** : গাইডবই নিষিদ্ধ করা হলেও এখনো তা বাজারে প্রকাশ্যে বিক্রি হয় এবং বেশির ভাগ শিক্ষার্থীরা তা পাঠ করে উল্লেখ করে এ ব্যাপারে যথাযথ পদক্ষেপ কামনা।
- ছ. **নিউজ টুডে** : রাজধানীতে যত্রতত্র ময়লা আবর্জনা ফেলা বন্ধ করতে নির্দিষ্ট জায়গায় ডাম্পিং স্টেশন করার সুপারিশ জানিয়ে সম্পাদকীয় প্রকাশ করেছে।

উপ-সম্পাদকীয়

জনকণ্ঠ পত্রিকায় প্রকাশিত কলামে উল্লেখ করা হয়েছে, নির্বাচনে জনগণ যাতে নির্বিঘ্নে ভোট দিতে পারে সেই ব্যবস্থা করা সব রাজনৈতিক দলের দায়িত্ব।

নিবন্ধ ও ফিচার

যায়যায়দিন পত্রিকায় প্রকাশিত ‘পাহাড়ে লাশ এবং আমাদের অক্ষমতা’ শিরোনামের নিবন্ধে অভিমত প্রকাশ করা হয়েছে, একের পর এক পাহাড় চাপা পড়ে জানমালের ক্ষয়ক্ষতির ঘটনায় পাহাড় ব্যবস্থাপনায় আমাদের অক্ষমতাকেই প্রকাশ করছে।

#

ডালিয়া/ মরজিনা/সাগ্দা/রশীদ/তানিয়া/২০১৭/৯.০০ ঘণ্টা